

«Per la scola na vegni betg pli simpel»

Lezia cumplexa per magistraglia en scolas cun rg ed idiom

DA FLURIN ANDRY / ANR

■ **La decisiun dal tribunal federal che ha confermà la prescripziun da la regenza grischuna da turnar tar l'idiom «da sutensi» ha consequenzas era per la magistraglia. Nesina Gartmann, la manadra da scola a Laax, infurmescha.** «La decisiun dal tribunal federal a Losanna sustegna tant la decisiun da la regenza sco era da la dretgira administrativa grischuna, quellas scolaras e quels scolars che han cumenzà cun rumantsch grischun (rg) en scola duain era finir cun quella varianta rumantscha», constata la manadra da la scola da Laax *Nesina Gartmann*. Ella ha ina tschert'enclletga che geniturs avevan recurri cunter la decisiun da la regenza grischuna en chausa: «I nun è natiralmain propi ideal sch'ils ins dals fragliuns emprendan en scola rg ed ils auters sursilvan. L'entir project dal rg en scola ha fatg en ina tscherta maniera naufragi, perquai èsi cha-paivel sche geniturs nun en uschè satisfatgs da la situaziun.» E tge consequenzas ha quai per la scola sezza? «D'avair sursilvan plus rg en scola fa ch'i daventa pli cumplitgà dad organisar l'instruc-



Diversas vischnancas han decis da turnar tar l'instrucziun idiomatica.

KEYSTONE

ziun», respunda ella, «i vegn a dar situaziuns che p. ex. in scolast che ha duas classes vegn a stuair dar ad ina classa rg ed a l'autra sursilvan.» Quai na saja segirmain betg ina situaziun ideala, constatescha ella, «ed era betg ina lezia simpla per las scolaras e per ils scolasts.»

Cusseglier guvernativ *Martin Jäger* percenter è surlevgià da la decisiun a Losanna: «Jau sun persvas ch'i fiss in dischavantatg per ils uffants sch'els avessan da midar amez lur temp da scola dad ina varianta rumantscha a l'autra.» L'anr avess laschà vegnir a

pled era il manader da scola en Val Müstair *Thomas Brülisauer* u a l'ina u l'auter magister. Causa il temp da vacanzas e la bell'aura nun era però nagin cuntanschibel.